



Samuel Umtiti football asaya
nungi anisüngzüker

Amit Shah-i temesepba mozü
anema nokdaksü ayongzüker



Mkg nung tzünglu kanga arutsü

Dimapur, September 16, 2025 (TYO): Mokokchung district nung September 16 nungi 18, 2025 tashi tzünglu kanga arutsü aser iba ajanga tzümetsüng, anentsü aser ayongtem nung tzi tuluba ayimsü atema Nagaland State Disaster Management Authority (NSDMA)-i metetdaksüogo.

Anungji Mokokchung district nung nübortemi anentsüh aluba tesemtem amalai maotsü, ayongkümleni maotsü mesüra süngdong tulutem akümbok nung malitsü metetdaksür ta Mokokchung Deputy Commissioner & DDMA Chairman Ajit Kumar Verma, IAS-i metetdaksü.

Mokokchung DC-isa Administrative Officers, Head of the Departments/ Village Disaster Management Authorities/Village

Council Chairman/Head GBs/ GBs/Ward Authorities dang lendong nungi jenbua alitsüsa mapatem inyaka atatsü aser ano lendong atalokdang nisung aser kiojen kümzüksü atema inyaksü metetdaksüogo.

Iba dak sendakba nung Village Disaster Management Authority (VDMAs)/Village Council/ Head GBs/ ward Authorities-i ayongküntem anüksü aser lendongtsüdong atalokra tsünglanglen agüja alirtem den tongteptsü akok ta paisa ashi.

- 1 District Disaster Management Authority (DDMA) Mokokchung: 6009479721.
2. State Emergency Operation Centre (SEOC): Tollfree 1070.
3. 112 (ERSS for Disaster Management).
4. 0370-2291 120/0370-2291 122.

AASU-i CAA anema lungkak aiter

Guwahati, September 16, 2025 (Agencies): All Assam Students' Union (AASU) aser All Dhubri District Students' Union ajanga September 15, 2025 nü Golakganj nung lungkak aitiba sentong ka agiogo.

Kaketshirtemi Assam nungi Islamic fundamentalists aser Bangladeshi nungertem jangjatsü aser meyipa yoksü atema takhangba agütsü.

Centre sorkari Citizenship Amendment Act (CAA) deadline atsülangtsü lemtetba ajanga Assam nung timtem ajurutsü ta tsübuja bilema kaketshirtemi lungkak aitogo.

Iba sentong nung kaketshirtem aser nübortem aikati shilem agi aser parnoki sorkar anema yimyim ayim.

"CAA ya 1985 Assam Accord

anema lir kechiyong iba accord ajanga March 25, 1971 sülen ozüng alema arurtem jangjatsü aser meyipa yoksü tashi agütsür" ta AASU district general secretary Jibon Barua-i ashi.

"CAA ajanga tamangba yimsü nung telemsa adokdaksür aser Accord mezüngmeshir. Assam maitsü melenba ozüng magizüker" ta pai ashi.

Lungkak aitertemisa National Register of Citizens (NRC) update asütsü aser India nunger ta kuli agütsürtem nem dang senso agütsütsü takhangba agütsüogo.

Parnoki Dhubri Deputy Commissioner nem memorandum ka agütsüogo aser sorkari mapa meinyakra AASU-i tesashiba lungkak aittsü ta tekümdangtsü metetdaksüogo.

NPCC-i NH-29 atema süoki ia bilemer

Dimapur, September 15, 2025 (TYO): Dimapur-Kohima tsüngda mapang shia National Highway 29 noktangba atema Nagaland Pradesh Congress Committee (NPCC)-i tebilemtsü abenba metetdaksüogo.

Ibala tenokdangba ajanga public nem timtem kanga agütsür, oset aser nisung senzüba noktanger aser senzügenbongertemi lendong ajurur ta NPCC-i ashi.

Lok Sabha MP aser NPCC President S. Supongmeren Jamir tang Brazil nung oa lir saka pai National Highways & Infrastructure Development Corporation Limited (NHIDCL) Executive Director RP Singh den phone tekarakba nung traffic lapoktsü shiogo ta Communications Department,

NPCC-i sangdong ka nung metetdaksü.

NPCC ketdangpur telok kati anentsüh alua aliba tesem semdangtsü atema ao saka parnok 'safety concerns' ajanga meyok.

NPCC ketdangpurtemi NHIDCL ketdangsürtemi den ajurutepa sensaksemdang anentsüh yahdokba mapabo temogo aser District Administration nungi temelaba atar ta ketdangsürtemi ashi.

Yasüng nungi lenmang lapokogo aser NHIDCL o District Administration-i mapang shitak nung lenmang lapoktsüsa mapa inyakba atema pelar. Iba lenmang mapang shia noktangba khuret ya agientsü atema long-term solutions nüngdaker ta NPCC-i metetdaksüogo.

RMSA-2016 tesayurtemi anogo tenetbuba lungkak aiter NAGA MOTHERS ASSOCIATION-i NAGALAND GOVERNOR AYONGZÜKER



RMSA-2016 tesayurtemi anogo tenetbuba lungkak aitiba noksa nung angur.

Kohima, September 16, 2025 (TYO): Nagaland RMSA-2016 Batch tesayurtemi lungkak ait tenzüker anogo tenetbuba nung Directorate of School Education nungi Civil Secretariat tashi jajaogo.

Mongulbarnü tesayurtemi placards aser banners bener ola adoka jaja. Parnoki scale pay, regularization aser state teaching cadre nung aniokang ta takhangba agüja lungkak ait.

"Onoki akhangba onüktem atema sorkar nungi telangzüba tajung mengura onoki mapa meinyaksü" ta Nagaland RMSA-2016 Teachers' Association (NRMSATA-2016) President Imlitemjen Imchen-i anir tesayurtemi ashi.

RMSA guidelines nung State aser UT sorkartemi unified teaching cadres ayutsü aser 'RMSA cadre' balaka metentetsü lateta lir. Tesayurtem ya state teaching system nung tongti shilem ka lir ta Imchen-i ashi.

Department-i scheme den külemi contractual basis co-terminus nung inyaksü atema

affidavit ka nung sign südaksütsü meranger ta paisa ashi.

Sorkari tesayurtem itasen Rs 31,000 nung Rs 25,000 ajemtsüba anema 2022 nung tesayurtemi Guwahati High Court nung ken o benok aser iba atema onoki temeten angu. Ajisüaka, State sorkari iba sülen Supreme Court nung Special Leave Petition (SLP) ka benok saka SC-i High Court obendang pusema nungit, ta Imchen-isa metetdaksü.

Okadaki tesayurtem pusema obendang agüjaka state sorkari iba onük atsülangtsü atema August 14 nü Supreme Court nung Review Petition ka benokba indang jembir saka iba petition ya ano magizük lir.

Nagaland sorkari School Education Department aser NSDMA ajanga 2016 batch tesayurtem ya RMSA kübok contractual basis nung aniok ta nenshiogo.

Tesayurtem kümsük ya scheme den co-terminus lir aser parnok asoshi Government of India nungi kümshia senotsü

angur ta sorkari ashir.

Supreme Court-i Review Petition atema oshidang agütsüba ama mapa inyaksü ta state sorkarisa ashi.

Külen, civil societies, kin hohotem aser kaketshir teloktemi lungkak aitiba tesayurtem pusema metetdaksüogo aser sorkar dang parnoki akhangba ama inyaksü rongshir.

Mongulbarnü, Naga Mothers' Association (NMA)-i Nagaland Governor dang iba onük atema mapa inyaksü ayongzükgogo.

Okadaki tesayurtem nem scale pay agütsütsü tetuyuba agütsüogo. Ano, state sorkari Supreme Court nung SLP benokba magizük aser High Court obendang nung tebang maitsü ta shiogo ta NMA-i Governor dangi züluba shidi nung shia lir.

State sorkari lungkak aitiba tesayurtem nem temeten agütsütsü aser memenui okadaki tetuyuba agütsübatem mapa küma inyaksü atema NMA-isa Governor dang mepishia metetdaksüogo.

Nagaland nung tzümetsüng aser anentsüh timtem ajuru

Dimapur, September 16, 2025 (TYO): Taoba hopta ka tsüngda tzünglu kanga aruba agi Nagaland nung anentsüh aser tzümetsüng lendong balala ataloka takoksa aika bentsür aruogo ta Nagaland State Disaster Management Authority (NSDMA)-i metetdaksü.

September 8 nungi 14, 2025 tsüngda Chumoukedima district nung lendong tamajungba ajurua liasü. Pagla Pahar aser Old Chumoukedima Check Gate anasa anentsüh aluba ajanga traffic timtem ajuru. Külen, Chathe River nung tzümetsüng ajanga ki aika raksatsü aser Chumoukedima o Seithekema sendaktepba apu ka ponger ao.

Ano, Chumoukedima ward 10, T L Angami Park, Virazouma village aser Army Camp, Shokhuvi tesemtem tzi agi mobang.

Shamator district nunga BSNL Tower fencing wall chirep. Peren district nunga Saijang village, Mangleu Bridge, aser Shokhuvi-Pimla-Mhainamtsi Road nung anentsüh alu aser Bana ward nung ki 11 raksatsü.

Meluri district nunga 16 Kilo mark nung anentsüh aika aluba ajanga senzügenbongertemi timtem ajuru aser Mercy Bridge nung tesenzü majung kümogo.

Dimapur district nunga Vilhume Colony, S M Colony, East Police Colony, Namgalong Colony, Ragailong Colony, aser

Kuda village tesem aika tzi agi mobanga liasü.

Kohima district nung Kigwema-Mima-Chakhabama aser Jotsoma-Khonoma lenmangtem densema lenmang aika nung anentsüh alu.

Noklak district nunga anentsüh alu aser gari lenmangtem noktanga liasü.

District ketdangsürtemi lendong atalokba tesemtem nung mapa inyakdar aser relief materials agütsüogo ta NSDMA-i metetdaksü.

NSDMA-isa rongdak mapang nung toll-free 1070 mesüra 112 ajanga State Emergency Operation Centre (SEOC) den tongteptsü akok.

Dmr & Kma tsüngda helicopter service tenzüker

Dimapur, September 16, 2025 (TYO): Dimapur aser Kohima tsüngda gari lenmang tajungba küma meyangu tashi Transport Department-i helicopter service

tenzükgogo.

Iba helicopter service ya Hombar nungi Hokolbar tashi senzütsü aser tsünglanglen agüja alirtem den osang agiteptsü akok.

Dimapur : Jelito : 7005063596

Robert : 9436073273/
8119962127

Kohima : Sivi Terhujah
9856200471/7005878828.

CMO Mokokchung nung District Review Meeting ka amen



Dimapur, Rongjui/Sept. 16 (TYO): Department of Health & Family Welfare Mokokchung indang District Review Meeting ka September 16, 2025 nü Chief Medical Officer's Office Mokokchung indang Conference Hall nung Dr. Sentizungla Marina Yaden, Chief Medical Officer, Mokokchung lenisüba kübok mena liasü.

CMO ajanga pela agizükba o jembidang, iba senden ya yimya ka ama adenshiba masü saka health indicators balala renloka aoba aser programmatic targets asadangtsü, block aser sub-centre level tem nung timtem ajuruba jangjatsü, tajangshiba

aser shisatsü lemsateptsü asoshi maongka lir ta ashi.

Nüburtem anema alitsü asoshi medical team ajanga anibelem mesasai mapa inyakba atema Dr. Marina-i tenüngsang agütsü aser maneni bendanga agütsür inyaktsü ayongzüka liasü.

"Grass root level nung bendanga agütsüba ya district public health system asoshi tamendak dak lir," ta lai ashi.

DR. M.A.M Azhar SMO WHO Mokokchung ajanga iba senden nung jembidang, Mokokchung ya GAVI district ka asünung Mokokchung District Headquarter nung WHO office amenokba nükjidong ya routine immunization aser vaccine

preventable diseases dak rangloksü asoshi lir, ta ashi.

Senden nung Ongpangkong, Changtongya, Tuli, Tsurangkong, Mangkolemba aser Alongkima indang Block Programme Managers temi pei sasep Block indang inyakyim osang agüja liasü.

TATTVA district Co-ordinator aser UWIN Co-ordinator nungia district nung parnok inyakyim aser takok anguba indang osang agütsü.

Iba senden nungya Programme Officers, Senior Medical Officer, Medical Officers, DPMUs aser CMO staff tem aden aser Dr. Limanaro DPO (UIP/ RCH) onir liasü.

Dimapur Police-i taila sen amshir nisung ka apu

Dimapur, Rongjui/Sept. 16 (TYO): Local YouTube news channel tem nung osang sangdongba nung ajemdaker Dimapur Police ajanga India nunger sen photocopy bena aliba nisung ka pua East Police Station Dimapur nung ken o ka benok.

Asüngdangyaba mapang sen ya India nunger indang sen 500 menüngzükbä liasü aser ashikülak mapa inyaktsü tebilemba nung sen ya menüngzükbä, ta jangjatet.

Customer nem taila sen ama mezüng chichiba sen note asem nungi pongu tsünga agütsütsü aser parnoki market nung tendanga temulung lemteta akumba sülen anasü agi tali

agütsütsü nangzüka taila sen timba agütsütsü parnok tasa liasü.

Iba sülen tai tonglokja alir temi taila sen talep ya opaque polyethylene packets nung aleper 'chemical process' atema anogo ana mesüra tali lir ang lapoktsü shir agütsütsü, aser iba sülen notes ya raksaa aotsü aser item sen bena alirtemi parnok külakoktsüogo ta memettdang parnok jena otettsü ta tasa liasü ta ashi.

Iba dak sendakba nung Dimapur Police ajanga nüburtem dang media platforms balala nung osang prokshiba manisadaksütsü ayongzükgö.

Tang social media sapang balala nung tai tongloksütepba

ya talisa tai tonglokja aser pua alir Kitoshi @ Lituna @ Linokali D/o Lt Hokheto Kiba ajanga sangdong tiazü agütsüba nung ajemdaker lir, shiba ano ashikülak mapa inyakba ken o ana Niuland PS aser Diphupar PS nung benoka aliba dak sendakba nung bushia liasü.

Lai iba ama ashikülak mapa aika nung shilem agia alitsü ta temulung melemtemi lir aser la ajanga timtem ajurua alirtem dang Police dangi arutsü ayongzüker. Ken o ya SIT ajanga kanga junga asüngdangya süogo aser iba ken o nung shilem agia alir ajunga aputsü meranger, ta Dimapur Police sangdong ajanga ashi.

NBSE ajanga APAAR ID amshitsü nenshia metetdaksür

Dimapur, Rongjui/Sept. 16 (TYO): Nagaland Board of School Education (NBSE) ajanga maneni sangdong ka nung NBSE den affiliate süa aliba school ajunga dang kaketshir ajunga jangjatsü asoshi kechi südir süaka APAAR ID (Automated Permanent Academic Account Registry ID) amshitsüla, ta nenshia metetdaksüogo.

Tenüng zülüokba kaketshir

shia nem school ajanga official UDISE-enabled portal ajanga APAAR ID tejangja ka-ka agütsütsüla.

Academic records, transfers, assessments aser co-curricular information densema kaketshir indang data ya APAAR ID nung inoktsütsüla aser iba maparen ya academic session 2025-2026 atema final term registration metenzükdang

renemtsüla, ta NBSE sangdong ajanga ashi.

Iba inyakyim dak sendakba nung kaketshir reju temi January 28, 2025 nü sangdong agütsüba nung aliba ama inyaktsü metetdaksür. Mapa shidak meinyakba ajanga record processing, examination registration aser danga academic administrative inyakyim menutsü, ta sangdong ajangasa ashi.



Tang telidak Aadi Karmayogi Programme nung shilem ka ama Mon District kübok District Process Lab Training ka September 16, 2025 nü DRDA Hall, Mon nung agia liasü. Training tenzüka EAC Mon Hq., Er. R. Mhao Humtsoe ajanga training nung adener pela agizük aser Aadi Karmayogi Programme rateta ashi.

Nagaland nunga Poshan Maah 2025 alitsü

Dimapur, Rongjui/Sept. 16 (TYO): Poshan Abhiyaan kübok State Project Management Unit (SPMU) ajanga Department of Social Welfare, Government of Nagaland-i sangdong ka nung ita tepiyong linük tesem ajunga nung Poshan Maah 2025 benjongmung ya September 17, 2025 nü tenzüksü aser October 16, 2025 tashi alitsü ta metetdaksüogo.

Poshan Maah ya 2018 nung tenzükbä sülen India nung nutrition indang nüburtem inyakyim tulutiba rongnung ka kumogo, kong küm shia state aser district ajunga nung inyakyim million aika inyaker.

Ibai Government of India indang flagship Poshan Abhiyaan (National Nutrition Mission) tamendak dak long ka ama kumogo, kong Anganwadi workers, ASHAs, schools, local bodies, frontline departments, NGOs aser nüburtemi shilem agir.

Iba sentong ajanga nutrition, health, hygiene aser

malnutrition-free India yangertsü asoshi nüburtemi anir mapa inyaktsü awareness kanga junga agüja arur.

Poshan Maah 2025 tenzüksü renemshiba mapang Joint Secretary & Project Director of Poshan Abhiyaan, Nagaland, Ms. Olemjungla Aier-i, "Poshan Maah ya linük tesem ajunga nung Jan Andolan ka kumogo, koba ajanga sorkar departments, nüburtem aser kibong tem lungjemer malnutrition anema rarar," ta ashi.

Nagaland nung, asenok sobaliba chiyongtsü yimya aser lokti tashi den iba linük mapa ya ajanga tetsütem tajungba akümsü, tanurtem tashi taitba akümsü aser ajak asoshi tarutsü jenjang tajung ka aatema inyaktsü mulunga lir, ta ashi.

Department of Social Welfare ajanga Nagaland nung aliba nübur ajunga dang Poshan Maah 2025 nung shilem agia Suposhit Bharat - Nourished India mangdang akangshitsü ayongzükbä.

Asür N. Bendang Ao indang takum otsü kaketsü



Asür N. Bendang Ao takum otsü kaketsü ka September 13, 2025 nü sayadang tangokba noksa ka nung Rev Dr L. Kari Longchar aser kaketsü zülur Tiala Imchen den kinungertem angur.

Dimapur, Rongjui/Sept. 16 (TYO): 'Masetshilung: Man of Principle' nungia agütsü Asür N. Bendang Ao indang takum otsü kaketsü ka September 13, 2025 nü Ao Baptist Arogo Mungdang (ABAM) indang taoba Executive Secretary, Rev. Dr. L. Kari Longchar-i sayaja liasü.

Iba kaketsü ya Tiala Imchen-i zülü.

Dimapur nung Northeast Zone Cultural Centre (NEZCC) tenzüksü asoshi State aser Central sorkari Asür N. Bendang ya shimtet, shiba Tsüngrem akumtsübobä aser tatishitsü tajung sayua litetba takum ka liasü, ta Rev. Kari-i ashi.

Tiala Imchen-i iba sentong nung jembidang Asür N. Bendang ya nübur meimba nisung ka liasü, ta ashi.

Takum nung timtem jenti ajuruaka N. Bendang ya tasü tait aser Tsüngrem akumtsübobä nisung ka liasü, ta

lai ashi.

Asür N. Bendang dak nübur anitsüba sempet aliba indang jembidang, 1964 nung pa Ao Kaketshir Mungdang tir inyaka liasü aser Naga Students' Federation (NSF) nunga ketdangsür liasü, ta ashi.

Taoba mapang külem tenzüker L. Chubalepzuk Jamir, retired Deputy Director, DIPR iba sentong nung dena paia Asür N. Bendang den külemi maparen balala inyakba indang lemsatapa liasü.

Iba sentong nung Rev. Dr. Wati Aier, Athriba Sangtam, Pastor, Tsür Baptist Church taoba Lok Sabha Member of Parliament, K. Asangba Sangtam, Neichute Doulo, CEO, Entrepreneurs Associates, Joshua Lorin, Principal, Oriental Theological Seminary (OTS) aser Dr. Alongla P. Aier, Professor of English & Communication nungeria jembia liasü.

Amit Shah-i temesepba mozü anema nokdaksü ayongzük

New Delhi, Rongjui/September 16 (Agencies): Union Home Minister Amit Shah-i Mongolbarnü, temesepba mozü yanglua ayokgertem anema jenjang agitsü aser linük nung lanurtem kümzüka ayutsü ayongzüka liasü.

Narendra Modi-i aniba sorkari linük nungi temesepba mozü ajak agintsü bendanga agütsür lir aser iba nükjidadong atongtsü atema jenjang tapet agidar, ta Union Home Minister Amit Shah-i Mongolbarnü ashi. Tanabuba State aser Union Territory indang Anti-Narcotics Task Force (ANTF) tekolaktem National Conference nung o jembiba mapang Shah-i, tarutsü nung takok timba ngyonga aotsü atema temesepba mozü achiba anema jenjang talila agitsü mapang tongogo, ta ashi. Narcotics Control Bureau (NCB)-i ayongzüka iba conference ya Mongolbarnü tenzükogo. Home minister-i ashiba agi, India ya 2047 küm tashi nungbo developed aser

tekümzüka kübok aliba linük ka kümdaktsütsü Ato Kilonser Modi nükjidadong lir. Paisa, PM Modi indang nükjidadong atongtsü atema linük ya lenla ajak nung kanga junga kümzüka alitsüla, ta ashi. "Temesepba mozü achiba ajanga timtem agütsüba agintsü asoshi Modi-i aniba sorkar mulungteter lir aser iba nükjidadong atongtsü atema takokba tashi jenjang agidar," ta Shah-i ashi. "PM Modi-i 2047 küm tashi nungbo India ya developed linük ka kümdaktsütsü nükjidadong lir aser iba atema timla tulutibaji lanurtem dak lir aser parnok mulungteter lira ajak takoktsü asütsü, kechiyong parnok ya linük ka tamendakdak lir," ta Shah-i ashi. Paisa linük kar nungbo linük terenlok aser temesepba mozü agi tetsüdaktsü adokdaktsüba ya sendaktepa lir, ta ashi. "Tia maka alima ajunga dangi temesepba mozü belener yokba tesem ana asenok den

kanga anasatepa lir. Anungji iba anema asoshi ajang ajanga raratsü mapang tongogo," ta pai shisem. Shah-isa, India ya developed linük ka kümdaktsütsü atema nükjidadong aliba ataloktsü asoshi lanurtem temesepba mozü nungi jenboa lidaktsütsü koda tongtibang iba indang lemsatepa liasü. Pai temesepba mozü cartel tapu asem indang jembi kongi linük nung entry point tem nung inyaksangshiba, entry point tem nungi state temi lemshiba aser temseepba mozü ayokba dokan tilala lapokba densema lir. "Iba amala cartel tem anema jenjang agitsü mapang tongogo. Temesepba mozü anema inyaktsü asoshi khuret agüja aliba ketdangsürtemi parnok anema jenjang tesashi agitsü telemtetba agiba sülenang iba ya ataloktsü," ta minister-i ashi. Home minister-isa, sen crore 4,794 alang linük kübok tesem balala nung apuba temesepba mozü raksa intoktsüba nung shilem agia liasü.

CM Soren-i tesayur 975 nem appointment shiti agütsü

Ranchi, Rongjui/September 16 (Agencies): Jharkhand CM Hemant Soren-i Mongolbarnü assistant tesayur (mathematics aser science) 909 aser postgraduate tesayur aser laboratory assistant 33 nem appointment shiti lemtsüogo. Kasa sentong nung Soren-i, Maukhyamantri Swachh Vidyalaya Puruskar Yojna aser Jharkhand E Siksha Mahotsav 2025 amenokja liasü. Paisa, Latehar nung Netarhat Boys' residential school ya co-education school ka agi melentsütsü ta ashi. CM-i ashiba agi, shisaluyim dak sendakba nung Jharkhand-a linük nung ajaki meteta kümdaktsütsü asoshi par sorkari jenjang aika agiogo aser item jenjangtem agiba tajangzük ngudar. Pai ashiba agi, "sensaker aser middle-class kibongtemi

parnok chirnurtem private school tem nungi CM indang school of excellence-i belener odar. Sorkar school tem ajaki jenjang aketba kaketshisatsü agütsüra sensaker aser middle-class kibongtemi loan agia pei tanurtem private school temi me yokla." Pai, tetoktepba putu ka nung sorkar school temi tebilemtsü aika ajangshir, kong tesayurtem agi anüంగా aser arrtsü atsi maliba densema lir, ta ashi. CM-i ashiba agi, Jharkhand ya linük nung tekübokba jenjang nung aliba sempet aketba kaketshirtem bendanglen oa azüngtsü asoshi scholarships agütsüba mezügbuba state lir. Paisa, temaba jenjang nung kaket shisatsü bushitsü atema Guruji Credit Card Scheme kübok sen lakh 15 tashi loan agütsüdar, ta ashi. "Shisaluyim dak sendakba

nung tinyaktsü aika lir. Shisaluyim jenjang ajungkettsü atema CM, minister, ketdangsürtem, tesayurtem aser kaketshirtemi dang khuret abentsü masü saka state nung aliba nüburtem ajaki khuret abentsüla," ta CM-i ashi. Kasa mapang nung state finance minister Radha Krishana Kishore-i, state nung school 7000 shi nung tesayur kaka dang lir ta ashiba den tang tesayur tasen shimba ajanga iba tebilemtsü ya terabo bentettsü, ta shisem. Iba sentong nung State labour department minister Sanjay Prasad Yadav aser Shilpi Neha Tirkey, Rajya Sabha züngsem Mahua Majhi, additional chief secretary Avinash Kumar, aser secretary of the school education & literacy department Uma Shankar Singh nungeria shilem agia liasü.

SC-i Maharashtra local body polls Jan 31 nü agitsü tuyu

New Delhi, Rongjui/September 16 (Agencies): Supreme Court-i Mongolbarnü Maharashtra nung local body election ajak agitsü atema 2026 küm January 31 latettsüogo. SC-isa, jenjang tapet magiba aser taoba mapang atakzükja toktsüba mapang nung election magiba atema State Election Commission (SEC) dak temulung masüba lemsatepogo. Okadakisa election agitsüba anogo joko ojang dang atsülangtsütsü ta jangja jangja metetdaktsüogo. Justices Surya Kant aser Joymalya Bagchi nai ashiba agi, Zila Parishads, Panchayat Samitis, aser municipalities ajak indang election atakzükja aliba mapang tashi nung tembangtsüla. "Local bodies ajak indang election 2026 küm January ita agitsü. State mesüra state election commission nem anogo atsülangtsü asoshi temelaba kecha magütsütsü. Tanga logistic teyari kar nüngdakra SEC-i 2025 küm October 31 matong tsüంగా okadak den tongteprateptsüla. Iba sülen temepshiba kecha magizüktsü," ta tetuyuba nung shia lir. SC-isa, tang benoka inyaka aliba delimitation exercise ya 2025 küm October 31 nü tashi nungbo tembanga inyaksüla, aser iba inyakyim ya election atsülangtsü asoshi tatemtsü ka ama bener marutsüla ta tekümdangtsü metetdaktsüogo.

SC-isa, electronic voting machines (EVMs) agi anüంగా, board tatidang mapang school azüంగా maliba, staff agi anüంగా amala kuli SEC-i bener aruba magizüki liasü. "Okadaki tuyuba ama atakzükja aliba mapang tsüంగా SEC-i jenjang magitet," ta iba bench yagi ashi. 2026 küm board tatidang March ita agitsü lir asünung parnoki January ita election agitsü latettsüba asoshi tanga kuli magütsütettsü, ta bench-i ashi. Staff agi anüంగా ken o bentettsü atema okadaki SEC dang nübu kwi nüngdaker iba indang osang tejangja hopta ana tsüంగా state indang chief secretary nem agütsütsü tetuyuba agütsüogo, shibai tanga department tem den tongtepratepa hopta pezü tsüంగా nübu yimtsütsü. EVM agi anüంగా dak sendakba nung SEC dang November 30 nü tashi nung compliance affidavit ka benoktsü tetuyuba agütsüogo. Other Backward Classes (OBCs) atema menden mekazüka toktsüba dak sendakba nung ken o bangdaka aliba ajanga Maharashtra nung local body election ya 2022 küm nungi magi arudar. Taküm May ita Supreme Court-i Banthia Commission report masüdag koba OBC quota inyakyim benoka liasü iba dak ajemdaker election ya agitsü tetuyuba agüja liasü.

Mallikarjun-i Bihar nung Congress election committee agizükogo



New Delhi, Rongjui/September 16 (Agencies): Bihar Assembly election agitsü lia Congress-i Mongolbarnü party indang Pradesh Election Committee tentetogo, kong Bihar unit tekolakba Rajesh Ram, Shakeel Ahmed Khan aser Madan Mohan Jha nunger densema lir. Election atema party kanga junga renemshia atatsü asoshi Pradesh Election Committee ya tentetogo. Congress tir Mallikarjun Kharge-i Bihar Pradesh Congress Committee indang Pradesh Election Committee amenoktsü atema benokba agizükogo aser iba committee ya amenokli nungi inyaksangshi tenzüksü. Committee nung züngsem 39 lir aser iba den Bihar nungi MP, MLA, MLC, AICC secretary tem, CWC züngsemtem ajak aser frontal

organisation tekolaktem ajak iba panel nung permanent tejaokertem asütsü. Election committee nung ano Rajesh Rathore, Motilal Sharma, Anshul Avijit, Qaiser Ali Khan, Ramesh Prasad Yadav, Shashi Ranjan, Subodh Mandal, Fauzia Rana aser Khushboo Kumari nunger ajak densema lir. Bihar nung election ya taküm November ita agitsü imlar. Iba election atema party ajak renemshi tenzükogo aser Congress, BJP, RJD, JDU nunger ajaki nüboyimba sentong balala ayongzüka agiba mapang kati ka aitsütepa arudar. Bighar Assembly nung menden 243 lir aser JDU puri Mahagathbandhan (Grand Alliance) toktsür NDA nung adenba sülen state nung NDA-i sorkar kümteter lir.

GOVERTMENT OF NAGALAND

DIRECTORATE OF TOURISM

NAGALAND: KOHIMA

nagalandtourisminfo@gmail.com

NO. TOUR/F&F/43/2025-2026

// Dated Kohima the 17th Sept' 2025

NOTIFICATION

In continuation to the meeting chaired by the Hon'ble Chief Minister on 12th September 2025 regarding the preparations for the Hornbill Festival, it is hereby notified that all Government Departments, Event Management Groups, and Business Establishments intending to participate in the Hornbill Festival 2025 are required to submit their applications along with complete event details and creative designs for inclusion in the Hornbill Festival 2025 Booklet on or before 30th September 2025.

All submissions must be sent via email to nagalandtourismmedia@gmail.com within the stipulated timeline. The creative designs must be submitted in the size of 25 cm × 19 cm (9.8 in × 7.5 in).

All concerned are requested to strictly comply to the above instructions to ensure smooth compilation and timely publication of the Hornbill Festival Booklet. Non-compliance within the given timeframe will not be entertained under any circumstances.

(VEYIELO DOULO)

Director Tourism



TIR YIMYIM YIMOBILEM (EDITORIAL)

DIMAPUR WEDNSDAY, SEPTEMBER (RONGJUI) 17, 2025

Azüngtsüba ya tongtibang

Tanü asüng lanurtemi dang masü saka asenok taintemi dena azüngba yimya toktsüogo aser azüngtsü melena tereprangdang repranger, anungji angur saka temulungjangi mair. Ibai smart phone ajanga bener arutsüba sobaliba tasen ka lir. Aji oda, nisung ajak mobile phone nung kechisarina reprangba agi mazüngi dang angur, iba jagi akhi ama kinunger o kinunger na aser medemer o medemer na tsüngda shisalemsatepa sensaksemtsü mapanga mangur. Ano, asenok rongnung sobaliba kanga tajung ka samadaktsüba ji tsüraburtemi tanurtem dang khen khen tar nunger otsü aser khen khen Laishiba nung aliba otsü tajungtem shia temulung tangdaktsüba yimya kenyongi mali akümba ya asütsü, kechiyong tsüraburtema mobile amshiba agi tanurtem dang otsü ashitsü mapang mali aser shidi asüyonga tanurtema mobile amshiba agi otsü angatsü mapang mali. Atangji, tsüraburtem o tanurtem na prongla mobile nungi otsü dang masü saka o jembiba aser ken atenba aser noksa tapu meyina tangari yokba reprangba aser angaba agi mapang shitak nung külemi chiyongtsüa mapang mengui alitsü, ajisüaka iba jagi kibong nungi tanur tajung akümtsüsabo mangazükttetsü. Iba ama putu tasen nung sobaliba aser libaliru kenyongi balaka aküm nungji, ashiko, nisung aikati kakat mazüngyonga ajungtsü, kechiyong ibai azüngba putu masü saka reprangba aser angaba putu lir ta ashitsü akok. Ibajia maitsü. Ajisüaka, ibaji shitak mesükba tashioiktsüba sayu o ka asütsü. Shitakba nisung ka tashitemetet küma shisa renloktsüba lenmang tngtibangtibajibo kakat azüngtsüba ya lir. Atangji, mobile nung alima nung adoka akaba kakat ajak enokja alitsü akok aser anogo shia osangkakettema züngtetsü akok, saka mobile nung kakat ka züngma azüngtsüba ji tasak, anungji mobile nung azüngba nungibo nüngdak nung agitsüsabo temulung nung merizüngtetsü. Ibaji angateta asenok tsüraburtemi anir kakat azüngba sobaliba dangi meyiptsüla. Asenoki aiben asen kin ayak mesamai akhüm keta alitsü asoshi asen tetsü oshi mesentoki wazüka ayutsü indang ajungshiteper, ajisüaka asenoki asen tetsü oshiji asen kidang mejembira aser mejembidaktsüra, asen tanurtemi asen tetsü oshiji kong angazüktsü? Kasaji, asenoki asen tetsü oshi wazüka ayutsü jembir, saka asenoki Ao osangkaketa mazünger, anungji Ao Lashiba aser Ao o nung adokba kakattem bushia oa alia azüngtsüba otsü maka. Asenok taküm aser kibong nung kechi mapa südirsüaka yimya sübaba dak keta lir. Aji oda, chiyongba yimya nunga kinunger külemi chiyongba yimya sübara, shingaia kija mechiyongtsü. Kasaji, kidang tsüraburtemi anir anepdang yakta osangkaket azüngba nungi tenzüka tanga kakattem azüngba sobaliba ka tanurtem tila asüdang nungi tenzükra, iba jagi yimya sübatsü. Talisa, tanurtem zünger kar government mapa aser kar business tapu balala inyaksü asoshi mapa bushi tenzüksü. Iba mapang parnoki mobile nung reprangba nungi masü saka parnoki azüngba kakat nungi angazükba aser metetba shisatsütem tatidang nung zülutsü aser bushiness mapa nung amshitsü. Iba jagi tatidang ajanga government mapa angurtem aser business tapu balala takok ngua tenzükertem ya mobile meranga reprangertem masü saka kakat meranga azüngertem lir ta angatetsü. Atangji, nisung ajak asoshi mobile ya tenügdaktsü kümogo, kechiyong tongteprateptsü asoshi dang masü saka temetetrüba aser tereprangnüba ajak mobile nung angur. Iba dakji alaka ano mobile ajanga dang shishilembaba mapa inyaker. Aji oda, mapa ajak nung shitak meshitak jangjatsü atema pei mobile nung OTP tama arutsü, anungji mobile phone ya o jembiba ocet ka dang masü saka nüngdak ajak nung amshiba teyarir tajung ka kümogo. Ajisüaka, mobile ya nüngdak nung dang amshitsüla aser mapang adok dang jet ta kakat azüngtsü yimya sübatsüla. Asen kibong ana, ka mobile dang reprangba kibong aser ka kakat dang azüngba kibong, iba kibong ana nungi tanurtem NPSC aser UPSC ama tatidang agütsü nung kakat azüngba kibong nungi adokba tanurtemi dang takok angutsü aser parnok jagi dang business nunga takok ngua inyaktetsü. Iba jagi, akhi mapang jembiba ama, tanüa tazüngerbo tazünger tetka maka, anungji terepranger masü tazünger akümtsüla.

OLEMSABANG

SANGRO : "TEBENJEM"

~ N. Saku Imsong, Diphupar

Hai Shisadangang, Tebenjem lanur ka jenjangji atsü ki nung naro tajung apong ama lir. Lokti aser kibong nung Teronem tajung adokdaktsür. Aji Arogo asoshi Senti rongsen lir. Yimden asoshi tarutsü nüklalong lir. Alima nem Teimla agütsüba aji Tebenjem LANURTEMJI lir.

Oh lanurtem apusoang asen tarutsü lima meraketa yangluti. Nuktsü yima tzüsener, Tsüngremer MIMONG aputetti arungma -oh lanur tem telongjemji temeim süngjang ta angateta, tai tokteper asen lima ya tesünep teronem tajung adokdaktsüti apusoang nee ta ayimoktsür. Hai asen lima kanga mejungi raksatsüogo ya molung meshiranger no shisadangang nee.

Hoi lanurtem tarutsü putusenji aser lanurtem meyong lir. Iba asoshi aser Tsürapur taküm jenti Tsükchirtemi samatsüoko nee. Bilemdangangju oh asen lanurtem. Tashi agi masü, saka tekolok aser shisatsü agi Tebu Tsüngrem dang temolongjang taroktiba nungi shisatsü meshir, asen lima asenok nem agüjang ta sarasademer apusoti koda ta ayongzüker.

Saka koda tesasatsüka nü lanuwa teti malitsü anüng nung mepet süitema ao medem, aser mapang ken dangako atapüsüa telima oh lanurtem.

Arung oh asen lanurtem. Aseni inyaktetsü mapa ajak inyakti. Nai ngutetba shisatsü ajak aneta bener tejakleni arung nee. Alimai asenok nungi kechi yimlar atalokdakjang nee oh tebenjem lanurtem, senti mapang ajak alangzükan, ya mapang tajung lir.

Nü taküm lenmang nung Tsüngrem tama südakjang kechiaser senso lima memeyimertemi telongjem raksatsür ta metetang. Septsü, tentsü mopungi asen SALANG anokshitsüdang, sorkari züzüa takzüdang lanurtem tali aleptepti. LONGJEMA lira anokshiaka melaotsü.

Tatem küma ya shinür, AROGOTEMI sarasademjang yimsüsürtemi nenok lenmang shidak Tsüngrem pelatsüsa sayuang, aser oh tebenjem lanurtem, NÜNO nungertemi nenok akhüm tsübur aser IMLAR ta ayimtenba na nüngi olaji angashiangma nooo ta sangdonger. Anungji tebenjem lanurtem nenok tembarji yi, drug, Sun Flower dang nenok tembar chichiba kümra asen tanü lanu putu aser tarutsü aliba asen tenununger putu yimli AYATAI asütsü ta shisaganga ochi sobutsü sobur apusoa asen lima mesoangni ta JAZÜKER

KUKNALIM

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

China nung Catholic bishop tasenbai par auxiliary ordain asü



Auxiliary Bishop Joseph Ma Yan'en

Beijing, Rongjui/Sept. 16 (Agencies): China nung Hebei province kübok Catholic bishop ka Vatican aser Chinese Communist Party (CCP) temelaba nung bishop kumer anogo ana lir pa indang auxiliary ordain asü, ta osang ajanga ashir.

Diocese of Zhangjiakou nung Bishop Joseph Wang Zhengui-i September 12, 2025 nü arishi küm 65 tain Joseph Ma Yan'en ordination sentong ketdangsüa agi, ta Vatican indang Fides news agency ajanga ashi.

Bishop shimtsü asoshi Vatican-China tezüngzüktep tawa yanglushiba nung aliba ama auxiliary bishop ya agizük.

1950s mapang communist temi China yimden agiba sülen Vatican den tesendaktep mejungi kumaka 2018 küm mezüng zülutepba tezüngzüktep yagi bishop tem shimba nung telok anaprongi tebilemba ashitsü melar ta ashir.

Auxiliary ka ama Ma Yan'en indang ordination sentong ya Zhangjiakou Cathedral nung sorkar meyong Hebei Provincial Committee for Catholic Religious Affairs temelaba nung agi, ta sorkari mela aliba Bishops Conference of the Catholic Church in China (BCCCC) indang report ka nung ashi.

Ma Yan'en ordination asüba sülen pai Constitution aser linük ozüng akumtsübotsü, linük telungjem aser lokti tesunep asoshi yaritsü, linük aser arogo meimtsü aser China nung Catholicism "sinicization" asüba lenmang wazüka ayutsü nangzük, ta osang ajanga ashi.

Sinicization ya political ideology ka lir, koba CCP-i amshitsü meranger aser iba ya ajanga China nung nisung, institutions aser loktiliba nung communist principles benoka amshitsü meranger.

Iba inyakyim anemer temi iba policy ya party aser par lenir sülen tashi angaa anidak daksütsü mechi CCP ajanga hadir ama amshir ta aitsür.

1946 küm April ita Pope Pius XII ajanga tenzüktsüba Xuanhua aser Xiwanzi arogo shibangja itemji melen Pope Leo XIV ajanga July 8 nü arogo tasen tenzüktsüba mapang ka nung Bishop Zhengui ya shima liasü.

Holy See Press Office

indang director, Matteo Bruni-i September 12, 2025 nü sangdong ka agütsüba nung, item tatalokba ya Holey See aser Chinese Authorities tsüngta jembishinüba nung süngjang atangba lir arogo tasen meshitetba nung tongtipang mera ka lir ta ashi.

Ano BCCCC ajanga osang ka agütsüba nunga kasa anogo kasa cathedral nung tang shibanger aliba Diocese of Xuanhua indang Bishop Augustine Cui Tai indang "retirement ceremony" agi ta ashi.

Iba sentong nung tamangba yimsü tsütsü lenirtem aser yimten yimsüsürtem densema nisung 50 aden aser sorkar indang bishops' conference nungi taoba bishop tushia shiti ka zünga liasü.

Cui-i iba sentong nung jembidang, Arogo aser linük ajungtsü asoshi inyaksü renema lir, ta sangdonga liasü.

China sorkari arishi küm 75 tain Cui nem yamaji tetushi agütsüba ya taoksatsü mapa ka

lir, kechiaser pa ya 2013 küm diocese indang coadjutor bishop ama ordination agiba sülen sorkari kodanga pa züngoka mamshi.

Tamangba yimsü nung sorkar ozüng tem pai kodanga magizük aser BCCCC aser Chinese Catholic Patriotic Association (CCPA) ama sorkari tenteta aliba telok tem bhukumba mali, anungji 2007 küm nungi sorkari Cui dak tenük yoka liasü.

Pa ya ishíben bo pua lira ser temang mejungi liaka mapang tatsütsü asoshi dang chioka liasü.

Bishop Cui Tai (2013) aser Bishop Ma Yan'en (2010) na Vatican temelaba nung ordained asü, saka tena ya linüki magizük.

Cui ya taküm arishi küm 75 junga canonical retirement süa liasü.

Nisung aikati Sino-Vatican agreement ya communist linük den tesendaktep tenzükshitsü aser sorkari melaba arogo aser Vatican den sendaktepa aliba underground Chirch tsüngta mapang talangka nungi telemsa adoka aliba tembangdaksütsü Rome indang nükjidong ka ama ajiteter.

Ajisüaka iba tezüngzüktep anemer temibo ibai China-i human rights aser tamangba yimsü anema inyakba nung Vatican ola madokdaksütsü asoshi hadir ka ama züngshir, aser sorkari reshikangshiaka Vatican sülen tashi anga anidakba underground Church raksatsütsü yimya ka ama lir ta ashir.

Charlie Kirk tepsetba benjonger Khristan tem Pastor Cymbala-i arütsü

Brooklyn, Rongjui/Sept. 16 (Agencies): Turning Point USA tentetsang Charlie Kirk tepsetba Brooklyn, New York nung aliba Brooklyn Tabernacle indang senior pastor Jim Cymbala-i Deobarnü aitsü aser pa asüba benjongertem ya Khristan anemertem lir ta arütsü.

"Ni nenok dang ya shiner: Charlie Kirk tepsetba nung tenok pelatepra mesüra temulung asüba lira mesüra pa tepsetba metentsüra, nenok kanga temenen nisung aser nai Tsüngrem angatettsüla aser nü temang tendangtsüla, kechiaser nüdak langka tai lir," ta Cymbala-i Deobarnü par arogopur tem dang ashi. Hopta shia iba downtown Brooklyn nung aliba tekülem kidangi nisung 10,000 shi arur.

"Aser na tekülem kidangi mapang talangka nungi aruba indang kü dang teshi. Na ya Khristan ka dang nungi tamajungba. Khristanpuri nisung asüba nung mepelar," ta pai ashi.

Arishi küm 31 tain Kirk ya Christian conservative activist tejangja nübu ka liasü, shibai TPUSA Faith tentet aser taoba Bodhbarnü Orem nung aliba Utah Valley University nung o jembidang anüngdang 12:20 ako

shidak nung pa tekong nung prangbong agi akha.

Pa asüba ajanga alima tesem ajunga nungi ola balala adok aser nisung kari pa asüba benjonga liasü. Alexandria, Virginia nung züngsem 12,000 aliba Alfred Street Baptist Church nung senior pastor Rev. Howard-John Wesley-ibo Kirk nem akhum magütsütsü, kechiaser pa ya "proud racist" ka lir ta Deobarnü sangdonga liasü. "Charlie Kirk tepsettsü langa mali. Saka "proud racist" ka mechi linük indang nisan tom ka atsüzükba ngua ni süngmanger, shibai arishi tepiyong iba lima nung telemsa aser tesempatep adokdaksütsü metsü proka liasü," ta Wesley-i Deobarnü pulpit nungi ashi.

"Aser item anemsü nisungtem ya tatalokba teshimtet kar nung ain adoker aser Charlie Kirk tepsetba atema jashir saka Melissa Hortman aser la kinungbo lar kidang khasetba mapangbo ola madok," ta Virginia megachurch pastor-i Kirk asüba nung telangzüba agütsüba aser Democratic Minnesota House Speaker Melissa Hortman aser la kinungbo Mark Hortman na June 14 nü par Brooklyn Park kidang khasetba medemdanga liasü.

ANO GO ABEN TSÜNGREM DEN

Tanen maka tetushi

(T.ken 47: 1-9)

Asenoki Tsüngrem tushibaji tanen maka tekülem lir. Asenoki iba ken ya onük balala asemsü nungi reprangtsü akok. Mezüngbuba, tesüiba otsü len nungi asenoki ibai reprangtsü akok. Hezekiai Sennacherib madak takok tulu anguba sayuba ken asem rong nung ibai ka lir (T.Ken 46-48). Kibubai Yihuda nunger asoshi kechi inyak? Pa alu (t. 1-4), atu (t.5) aser amen (t. 8,9). Ibai Kibubai asenok asoshi kechi inyak iba noksaji lir: Asenok temenen asoshi asütsü Pa alu, shia aru aser tang Kotak nung mena lir.

Asenoki ano iba ken tarutsü ainkar tsütsü nungi reprangtsü akok. Israel nunger Yakob timtem ajanga aotsüba liasü. Saka Yisu alu aser takok tulu angu (J.Adok 19), aser Israel Kibuba sentsüwangshia tushidaki aitsü. Tanü kin ajak ain adoker, saka tarutsü nung parnoki Pa tushitsü. Yisu arutsü aser pa yimli yangertsü aser Abraham dang nangzükba atalokdakja Pa nungi jakzükba jenti arentsü.

Mesüra iba ken tang mapa nungi reprangtsü akok. Tsüngrem külemba tetezü asen temulungjang nungi külemba aser tushiba ajak Pa nem agütsütsüba- Pa kechi lir ajak asoshi asenok kechi ajunga agi agizüktsüba. Iba ken yagi koda külemtsü ibaji sayur. Mezüngbuba, asenok tekülem teyongtsüji Tsüngrem lir (t.1). Asenok takoksang Tsüngrem külemer. Tanabuba, asenok tekülem nükjidongji Pa uludaksütsüba (t.9). Asenoki Pa uluba tushitsüla. Tushibaji kuli asüba aser tekülem nung ajangshiba ka lir. Asenoki Kibuba ulutsüdi kechiaser asenoki Pa tushi dalang.

Tsüngrem tushiba nung mapang atakteta mali. Pa nüburi Pa tushir aser tushitsüla. Pa uluba ajungketsü asoshi asenoki Tsüngrem tushir. Nai Pa tushia külemer asü?

"Kü takum asoshi temeim mesüra akhumtsübo mesayuba nisung ka asüba atema ni komasür temeim sayutsüar kü dang shiang. Laishiba nung temenen tushitsü shia mali. Aser iba atema ni timtem ajurutsü ta meteta lir, saka na komasür asü, ibaji ajanga na takum alidang lisaba mekumzüktsü," ta Wesley-i ashi.

"Na asüba ajanga na 'hero' makumtsü. Ibaji ajanga na tushia amshir ka mekumdaksür. Ibaji ajanga na akumtsüboa amshir ka mekumdaksür. Na asüba atema ni jashitsü saka nü takum indang mebenjongtsü."

Kirk asüba nung benjongba mesüra temulung anisüngzük anguba atema Khristanpur marütsüdag, Cymbala-i Laishiba tesayuba ka benoka jembi aser iba mapang, tesempatep ajanga tang alima nung telemsa aser rara adokdaksür aser Arogo temi Yisu temeim angatettsüla, ta ashi.

"Tang asenok ya kangasa tebour majung aser tesempatsü lima ka nung alir... Tesem balala nung tekülem ki rongdoktsür, Khristanpur tepseter. Asen lima nung tesempatep lir," ta Cymbala-i ashi.

"Anungji asenoki aji amshia kechi inyaksü? Anungji asenok khien atema atsüngzüka oti.

Yisu-i 'Oang aser akuma tesem ajunga nung osangtajung sangdongang' ta ashi. Kechiba? Kechiaser alima nung nüburtem kumzüktsü nüngdaker. Parnoki Khristan indang osangtajung angashitsüla, temulung tasen akumtsüla aser parnok takum melenshitsüla... Yamaji inyaksüba nisungtemji Arogo ya lir. Asenok ya alima tesangwa lir. Linük ka masü, political party ta masü, Arogo, asenok ama tanaben asoba tamangertem."

Saka alima nung Tsüngrem osang sangdongtsü melen aiben alima tanüla Arogo nung alir," ta Cymbala-i ashi.

"Anungji Arogo nung asen sempar lir, aser aji kanga tejashitsüka lir. Anungji tekülem kidangi oa tenüngsang ken atenba nisung lir. Saka nisung kari parnok anema nokdakra, parnoki sempar. Parnoki kecha indanga mejembitsü," ta ashi.

Temeim mesayuri chichiba Khristan yimsü mesayur, ta Cymbala-i ashi.

"Asen tenük agi anguba adianu aser adianutsür tem memeimer temi asen tenük agi manguba Tsüngrem memeimtsü. Aser Pai asenok dang, shibai Tsüngrem meimer, pai pei adianu tema meimtsü shia lir," ta Cymbala-i ashi.

AO OSHI ANGAZÜKDAK:**TANÜ ANGAZÜKTSÜBA OJANG****Teyarir**

(n) mapa nung asemer, nungiter (helper)

* Tantsür tambur kümer kidang teyarir nungdaker.

Teyaya

(v) chiyongtsü chir tebang mesakba (pungent, burning taste)

* Mongmong karbo teyaya lir.

**OLONG PAITEP # 7273**

	1				2			3		4
5								6		
7			8							
								9		
		10								
11										12
					13					
					14					
15										

TIPIEN

- Balaka - (5)
- Aika shirangba - (4)
- Tar tatsü - (6)
- Nenü'er jabaso - (4)
- Sen latetsüba - (7)
- Tangar kübok alir - (4)
- Lon nung inokba - (6)
- Tzü ayimdak - (4)
- Ajak - (5)

LANGTSÜNGLEN

- Hai sür inyak - (4)
- Aor tenüng ka - (6)
- Ali telungi talangka lur - (5)
- Tebang kenyonki mazüoker - (4)
- Ken atema anenzükertem - (5)
- Toktepa noktak - (5)
- Sen - (6)
- Benjong agi - (5)
- Telung nung rizünga ayu - (4)
- Tebang nung enok - (4)

OLONG PAITEP # 7272 TELANGZÜBA**TIPIEN :**

- Aben, 4. Artsü, 7. Lisem, 8. Liwa,
- Sarasadem, 12. Aket,
- Mangu, 15. Anünü, 16. Ango.

LANGTSÜNGLEN :

- Aruli, 3. Balala, 5. Suwar,
- Belem, 9. Süjak, 10. Aonung,
- Dokan, 13. Tinu.

NAI-A YA METETTER

September 14, 2025 nü Nigeria nung chef aser taoba Guinness World Record holder Hilda Baci-i ano alima otsü tasen ka yangluogo. Baci-i 'largest dish of jollof rice' otsü yanglutsü meranga liasü.

Jollof ta asüba ya West African dish ka lir aser nungtugu food influencer Baci-i Lagos nung iba otsü yanglutsü merandang nisung meyirjang aika adenshia liasü. Lai iba dish atema jang seret 4,000kg (8,800lb), tomato paste 500 cartons aser piyaz seret 600 den napongshi seret 168 meyokteper aso. Baci den nisung 10-i yaritepa ghonda 9 asoba sülen chipo tuluji touzük metettsü atema ajungketdang chipo nung tetsüng ka sükdang saka Guinness World Records (GWR)-i video balala repranger kuli agütsüogo.

2021 nung Sarma-i Sonowal anema tasa atonga inyak

Guwahati, September 16, 2025 (Agencies): Taoba AGP MLA Satyabrata Kalita-i Chief Minister Himanta Biswa Sarma dak tai tongloksüogo.

Kalita-i tawa Congress nung denogo aser pai osangbener den jembidang Sarma-i 2021 nung Sarbananda Sonowal anema inyakba osang lemsatep.

Sarma-i Sarbananda Sonowal nem Chief Minister meinyakdaksütsü atema tasa atonga inyak ta Kalita-i ashi.

Citizenship Amendment Act (CAA) anema noktakba atema 2021 elections nung pa nem ticket magütsü aser AGP-i ashikülak mapa inyaker ta Kalita-isa ashi.

"Külen, AGP-i CAA anema Supreme Court-i ao aser külen Rajya Sabha MP Birendra Prasad-i CAA pusema vote enoktsü. Ni iba anemsü mapa ajanga takoksa ajuru" ta pai ashi.

Ozü Kamalpur constituency nung AJP aser Raijor Dal amenoka mali saka Congress bo tera yanga lir ta Kalita-i Congress nung adenba atema kuli agütsü.

"Sonowal noktangtsü atema Himanta Biswa Sarma-i MLA talila aginü. Iba tasa nung ni takoksar ka aküm aser 'dada brigade' nung züngsem kar nem ticket agütsü " ta Kalita-isa metetdaksü.

"Ticket alemba sülen nungi

Sarma-i Sonowal anema tasa atonga inyak. Sarma nem Chief Minister menden magütsü süra BJP-i sorkar akümtsüba nung pai tenokdangba agütsüla. Pai AGP, AIUDEF, aser tangar den lokteper sorkar ka akümtsü merangla. 2021 nung Sarma nem masü Sonowal nem vote enoktsü. Nübertemi Sonowal tejak repranga vote enoktsü" ta Kalita-isa ashi.

Congress nung Kalita adenba ajanga party tashi itshiogo aser BJP sorkar anema hadir tajung ka n nguogo. Pai ashiba onüktem ajanga Assam nung election agitsü jakdang o atsütep tulu ka tenzütsü imlar.

Meghalaya nung India & Thailand joint military exercise agi

Shillong, September 16, 2025 (Agencies): Indian Army aser Royal Thai Army tsüngda amaliteptsü aser angazükteptsü atema agia liasü.

Tatembang telemsa nung 48-hour validation exercise ka agia liasü. Iba mapang sepaitemi complex operations agia liasü.

Umroi Cantonment, Meghalaya nung aliba Foreign Training Node nung iba atema sentong ka ayonga agi.

Iba exercise ya United

Nations mandate kübok agi aser Indian Army aser Royal Thai Army tsüngda amaliteptsü aser angazükteptsü atema agia liasü.

Tatembang telemsa nung 48-hour validation exercise ka agia liasü. Iba mapang sepaitemi complex operations agia liasü.

Tanü tembangba sentong nung sepaitemi tajungtem nem

sempettem agütsü aser linük ana sobaliba lemsatep. Maneni exercise mapang volleyball, basketball, aser tug of war amala asayatepa liasü.

Joint military training ajanga operational cooperation akangshiba dang masü saka India o Thailand tsüngda defense tesentaktep akangshiogo ta ketdangsürtemi ashi.

Encourage Healthy Habits & Prevent Childhood Obesity!

Include fruits and vegetables in diet

Cut back on extra oil, sugar and salt

Avoid packaged & processed foods

Limit screen time. Encourage reading

Encourage outdoor play

Ensure 6-8 hours of sleep for better health

Aadhaar enrolment centres are available in all ICDS Projects and the Directorate of the Department of Social Welfare

Israel-i Gaza nung raraba ya kin ajunga samatsütsü merangba lir: UN



New York, Rongjui/Sept. 16 (Agencies): Israel-i Gaza nung raraba ya kin ajunga samatsütsü merangba lir ta United Nations ajanga bushitet, koba küm ana jungnüa raraba nung tongtipang mapang ka alitsü.

UN Independent International Commission of Inquiry on the Occupied Palestinian Territory indang chairwoman Navi Pillay-i Mongulbarnü osangbener parnoki bushitetba indang ashi aser iba mapa tamajung ya Israel Ato Kilonser Benjamin Netanyahu, taoba Defence Minister Yoav Gallant aser Tir Isaac Herzog nung densema Israel lenirtem mapa lir ta ashi.

"Parnoki sangdong aser totuyba agütsüba nung ajemdaker onoki tir, ato kilonser aser taoba minister of defence nungertem jangjatetogo," ta Pillay-i ashi.

"Item nisung asem ya linük indang agents tem lir asünung, ozüing kübok iba azüdokshi ya linük mapa lir. Anungji State of Israel-i "genocide" mapa inyak," ta lai ashi.

Israel ketdangsür temi sangdong balala agütsüba den külemi kin ajunga samatsütsü tebilemba aliba kuli kar commission ajanga ngutet, ta report ajanga ashir.

"Israel ketdangsür aser Israel security forces ajanga Gaza Strip nung Palestine nung ajunga mesüra shilem kar samatsütsü tebilemba liasü ta Commission ajanga angateter," ta report nung shia liasü.

Ajisüaka Israel indang Ministry of Foreign Affairs-i iba inquiry ajanga bushitetba ya taila lir ta aitsü aser iba report yanglur ya " Hamas proxies " ama lir ta X nung aitsü.

"Report ya ajunga Hamas-i

tiazü ashiba indang lir, dangari ashiba nenshiba dang lir," ta ministry ajanga ashi.

"Israel-i iba osang ya tiyazu aser tai lir ta khenyongi magizüker aser iba Commission of Inquiry ya tangsa agientsu akhanger," ta ashi.

Israel indang permanent representative to the UN, Daniel Meron-ia iba inquiry ajanga ngutetba ya aitsü.

Gaza nung Israel-i 'genocide' mapa inyak ta aitsüba ya tang mezüing masü.

2023 küm South Africa-i International Court of Justice nung Israel anema ken o benoka Gaza nung par inyakyim ya genocide lir ta shia liasü. Iba ken o ya tang tejembidak lir.

April ita Amnesty International-ia Gaza nung Israel-i Palestine nung samatsütsü tebilemba nung inyak ta ngutet.

Hamas-i October 7, 2023 nü Israel south tsütsü maka nisung 1,139 tepseta nisung 200 dak tema pua bener aoba anogo Israel-i Gaza nung iba rara tenzü.

Israel-i Gaza nung bomb poklokja ground operations agiba nung nisung 64,871 tepsetogo aser 164,610 yiruja lir, ta Gaza indang Ministry of Health ajanga Hombarnü ashi.

Britain-i Philippines den VSA ka yanglutsü sensak semner

Manila, Rongjui/September 16 (Agencies): Britain-i Philippines den Visiting Forces Agreement ka sensak asemtsü atema mulunga aliba lemsatepogo, ta Manila indang Defense Secretary Gilberto Teodoro Jr-i Mongolbarnü ashi.

South China Sea nung tensa mejungi küma aoba mapang anüolen aliba linüktem den security dak sendakba nung tesendaktep akangshitsü asoshi Manila-i jenjang agidar.

Teodoro-i ashiba agi, Britain indang Minister of State for Defence, Lord Vernon Coaker-i, Manila nung senden ka amenba mapang British Defence Secretary John

Healey nungi shiti ka agütsü, kong linük ana tsüingda kati ka dangi sepai yoka amenoker inyaksangshitsü asoshi tenanzüktepba ka yanglutsü tejangraba aliba lemsatepogo.

National Defense Department-i tanga sangdong ka ajanga ashiba agi, linük anapronglai regional security tensa indang lemsatepogo, kong South China Sea nung tensa indang sensaksemba densema lir. South China Sea nung Philippines aser China na aiben mangatettep adoka arudar.

Sepaitem yoka amenoktsü asoshi tenanzüktepba yanglutsü benokba ya Philippines-i, United States,

Australia, New Zealand aser Japan nung den tenanzüktepba yanglur aliba den mesükteper.

Budget session nung jembiba mapang Teodoro-i ashiba agi, taruba küm military services tem rongnung Philippine Navy nem sen timba agütsütsü. Navy atema sen ya 8.3 billion pesos (\$140.48 million) mesüra 16% agi timba agütsütsü. Taküm navy indang budget 51 billion Philippine pesos lir.

Budget ajungkettsüba ajanga frigates tasen ti arutsü aliba atema renema atatettsü aser shipyard aser dockyard facility tasen ka yanglutsü asoshi teyari agütsütsü ta Teodoro-i ashi.



Tawa Kathmandu nung sorkar anema longkak aitba mapang asürtem asüpila sentong nung shilem aka ama kinungertemi gari nung yimdong süa mang bener jajaba noksa angur.

OFFICE OF THE

KHAR VILLAGE COUNCIL

P.O. Mangkolemba : B.P.O. Khar

Mokokchung : Nagaland

MANGKOLEMBA NUNGJA RATETTSÜR

Aki alemli tsürabur leptept tsüingtep mapang nung Khar nunger aser kishikinar yim na Mangko lepa bener arua Mangko lemsateper senshiba jaka asüba agi iba jaka dang Mangkolemba ta ajar.

Iba otsü nung shir Mangko alep, kwi aser kodang metetnera Khar Putu Menden dangi arung ta iba sangdong ajanga metetdaksür.

Sd/-

(OSEMTOBA)

Chairman, Khar Village Council

Sd/-

(TONGPANGTEMSU)

Secretary, Khar Village Council

F. No. P-L-02001/1/2025-PL

Government of India

Ministry of Environment, Forest and Climate Change

Policy and Law Division

NGT Cell

.....

Level-I, Jal Wing,

Indira Paryavaran Bhavan,

Jor Bagh Road,

New Delhi-03

National Green Tribunal (NGT) nung Judicial aser Expert Members posts tazüing pongu-ngu (05 each) atema Ministry of Environment, Forest and Climate Change ajanga applications meshir.

Qualifications, terms of office, age limit, conditions of service etc amala Ministry indang website www.moef.gov.in nung angutsü. Application Form dena advertisement tejangja Ministry indang website nung <https://parivesh.nic.in/newupgrade/#!/legal-vacancies> nung angutsü.

Ministry nung application agütsütsü asoshi iba osang 17/10/2025 (23:59 hours (midnight)) adoker hopta pezü tashi alitsü. Applications den nüngdakba ajunga online (<https://parivesh.nic.in/newupgrade/#!/legal-vacancies>) nung agütsütsüla. Danga yimya nung application agütsüba Ministry-i magizüktsü aser atakzüktsüba anogo alemer agütsüba application magizüktsü.

Note: Taoba mapang 29.03.2025 advertisement nung ajemdaker application agüja alirtemi agütsütsü menüingdak aser advertisement tasen nung metetdaksüba vacancy ajunga asoshi parnok application agitsü.

CBC 13101/11/0018/2526

Russia-i Zapad 2025 military drills nung cruise missile tem tendang

Moscow, Rongjui/September 16 (Agencies): Belarus den Zapad (West) military drill ayongzüka agiba mapang Russia-i, Barents tzüyim nung cruise missile tem tendangogo, ta Russia Ministry of Defence-i metetdaksü.

Kidanger linük ana tsüingda anogo pongu tashi military drill ayongzüka agiba Mongolbarnü tembangogo. Moscow-i Polish aser Romanian airspace-i parnok indang drone yokba ajanga NATO linüktem den tensa mejungi aliba mapang Russia-i Tu-160 strategic bombers tema tendanga liasü.

Belarus nung sepai 6000 densema sepai 7000 shi-i iba exercises nung shilem agiogo, koba Belarus aser Russia na nung agia liasü.

Polish aser NATO sepaitemi Poland anüing nung Russia-i Ukraine amaktsü atema yokba drone tem khazüka yokba sülen anogo ishika lir iba drill ya agia liasü.

Russia-i Ukraine amak tenzüka sülen Russia-i aiben aibelen menaogo, saka NATO litsü kecha nunga iba amai jenjang magi liasü. Russia aser Ukraine na rara tenzüka sülen Bodhbarnü mezüingbuba NATO züingsem kati injang khalokja liasü.

Russia-i Ukraine amakba

mapang Romania anüing ajanga drone ka yokba sülen Romania-ia Deobarnü fighter jets tem yoka liasü.

Iba tatalokba sülen drill ayongzüka agiba ajanga kidanger linüktem mesüingjemteti aküm aser Poland-ibo Belarus den arrtsü khen atema shibangja liasü.

Russia indang Defence Ministry-i Mongolbarnü ashiba agi, nuclear-capable bombers temi Barents Sea nung cruise missiles tem tendangogo. Missile tem ya ghonda pezüshi yima ao aser MiG-31 fighter jets temi escort süa liasü.

Belarus ya Russia den kanga junga sendaktepa lir aser parnoki Ukraine den rara ya pusema arudar, ajisüaka parnoki sepaibo meyok. Belarus lenir Alexander Lukashenko-i, Belarus nung tactical nuclear missiles tem amenoka ayutsü atema Russia tir Vladimir Putin nem temelaba agütsüogo.

United States military officers temi Hombarnü Belarus nung Zapad exercises repranga liasü, koba ajanga tir Donald Trump kübok US aser Belarus na tesendaktep tajungba akümba sayur.

Kasa mapang nung Russia-i Mongolbarnü Ukraine nung nisung ana tepset aser teku yiruja liasü, ta Ukraine nung ketdangsürtemi metetdaksü.

Samuel Umtiti football asaya nungi anisüngzüker



Rongjui/September 16, 2025 (Agencies): Taoba mapang Barcelona nungi defender Samuel Umtiti-i arishi küm 31buba nung pa football asaya nungi anisüngzüker sangdongogo.

Umtiti ya Olympique Lyonnais nungi aniteta asayar ka, kong pai 2012 küm mezügbuba professional contract nung sign süa liasü. Iba sülen coach Luis Enrique kübok defence akangshitsü atema pa 2016 küm July 14 nü FC Barcelona nung oa aden.

Barcelona nungi asayaba mapang Umtiti-i La Liga titles ana aben aser Copa del Rey asem koka liasü. Iba mapang pai France team nungia tongtibang shilem agia parnoki 2018 FIFA World Cup koka liasü.

Jersey No. 23 semer Umtiti Barcelona nungi season trok asaya aser pa ya iba club nungi timbaben (134) asayaba France nung rongnung pongububa aküm.

Barcelona nung asayaba sülen pa Italy nung oa Lecce

aser France nung Lille nungi Ligue 1 nung asaya aser taoba lemluwa free agent ka aküm.

Tang Umtiti-i Hombarnü sangdong ka ajanga pa club kecha dena tenangzüktepba meyanglutsü ta ashiba den social media ajanga pa asaya nungi anenba sangdonga liasü.

"Tajung tamajung ajak ajangshia asaya aruba sülen asaya nungi anentsü mapang tongogo," ta pai Hombarnü Instagram ajanga metetdaksü.

"Ni akokba tashi meranga asayaogo aser kecha tesasa mali," ta defender yagisa shisem.

Umtiti-isa, pa asayaba club, tirttem, coach tem aser asayartem ajak dang kanga pelaba lemsatepa liasü.

Defence nung asayasang yagi 2018 küm World Cup semi-final nung Belgium den asayaba mapang goal ka idakja parnoki asaya koka liasü.

Kasa asayamung final asaya koba France-i goal 4-2 agi koka liasü iba asaya nunga pa tetenzük nungi asaya liasü

Ajisüaka iba sülen pa temekok yiruba ajanga timtema aruogo aser mapang talangka asaya nungi atsüingina alitsüsa aküm.

NSF MM Trophy: PLLA aser Mao SU nati takok angu



Kohima, Rongjui/September 16 (TYO): 25buba NSF Martyrs' Memorial Trophy 2025 nung Mongolbarnü Indira Gandhi Stadium, Kohima nung PLLA (Manipur) aser Mao Students' Union nati pei tata asaya kokogo.

Mezüngbuba asaya nung PLLA (Manipur)-i goal 8-1 agi Ensemble FC koka liasü.

PLLA nungi asayar Ngamkholal-i goal asem idaktsü aser Hemgoulal Laphoia goal ana idakja liasü.

Lumgousem Kigpen, Samuel Satgousem aser Jangminlal Haokip nungeria goal kaka idaktsüogo.

Ensemble FC asoshi goal ka ya Phanjamo Ezung-i idakja liasü.

25th NSF Martyrs' Memorial Trophy 2025 Steering Committee züngsem Kapani Krichena-i, PLLA nungi asayar Ngamkholal nem 'Man of the

Match' naroküm agütsü.

Tanabuba asaya nung Mao Students' Union (MSU)-i goal 3-0 agi Highlanders FC Pfutsero koka liasü.

MSU atema W. John Singh-i minute 11 aser 59buba nung goal ana idaktsü aser Lohrii Kaisii-ia goal ka idakja liasü.

Asaya nung MSU nungi W. John Singh nem "Man of the Match" naroküm agütsü. Iba naroküm ya taoba Angami Students' Union tir Bisevi Nakhro-i agüja liasü.

Asaya tembangba sülen Mao Union Kohima, Mao Students' Union (MSU), Mao Students' Union Kohima (MSUK) aser temlungertemi stadium's gallery merektetja liasü.

September 17 nü asayatem:

1. Onyx Titans FC vs United Brothers Club, D'Block
2. Nurturing Youngsters Vs Riiffiino Boys.

PCB-i ICC nem tashishiba agütsü

Rongjui/September 16, 2025 (Agencies): Asia Cup nung India Pakistan na asayaba mapang India nung asayartemi salem masüba ken o ya tuluka küma mora oa Pakistan Cricket Board (PCB)-i International Cricket Council (ICC) nem tashishiba ka agütsüogo.

PCB mendenbuba Mohsin Naqvi-i Deobarnü ashiba agi, board-i Match Referee ya Asia Cup nungi agintsü takhangba agütsüogo. ICC Code of Conduct aser Spirit of Cricket dak sendakba nung MCC temzüng ozüng nung aibelenba atema pa iba asayamung nungi agintsü takhangba agütsüogo.

"ICC Code of Conduct aser Spirit of Cricket dak sendakba nung MCC temzüng ozüng nung aibelenba atema Match Referee anema PCB-i ICC nem tashishiba ka agütsüogo. PCB-i Match Referee ya Asia Cup nungi tangsa tang agintsü takhangba agütsüogo," ta Naqvi-i X nung post sütsü.

Dubai International Cricket Stadium nung toss asayaba mapang Pakistan captain Salman Ali Agha aser India captain Suryakumar Yadav na asayashia salemtepba ama salem masü. PCB-i ashiba agi,

match referee Andy Pycroft-i Salman dang salem masütsü atema tetutyuba agüja liasü.

Maneni asaya tembangba sülen Suryakumar, shibai India team takok dangi ania liasü pai pa indang partner Shivam Dube den salem asü, saka Pakistan nung asayartem den salem mesüi ground nungi tuguatok.

Iba inyakyim ngua tezü adangba Pakistan coach Mike Hesson-ia lemsatepogo.

"Asaya tembangba sülen salemtsü atema onok renemer liasü. Opposition-i onok den salem masüba atema onok tezüdanga liasü. Onok salemi ao saka parnokbo changing room-i oatoker liasü. Asaya mekoki onok asayaba yimyadak tezüdanga liasü saka onok oa salemtsü mulunga liasü," ta Hesson-i ashi.

Iba jenjang agiba anema Salman Ali Agha-ia post-match presentation ceremony nung shilem magi, koba ajanga mepetmesü taliba aküm.

Ajisüaka Pakistan Cricket Board's (PCB)-i match referee Andy Pycroft melentsü atema mepeshiba ya International Cricket Council (ICC)-i magizük.

ICC-i ashiba agi, ground

nung Asian Cricket Council (ACC) ketdangsürtemi Pycroft dang toss mapang salem masütsüba indang metetdakja liasü. Ken o mejangjatsü tsüngda Pycroft ya India-i ashiba sülen anidaka inyaksangshir ta Pakistan-i bilema aliba jangjatsüogo.

Dimapur Pickleball Open Sept 20 aser 21 nü asayatsü



Dimapur, Rongjui/September 16 (TYO): Dimapur Pickleball Open 2025 September 20 aser 21 nü The Fitness House (TFH), Dimapur nung asayatsü, koba Nagaland nung pickleball asaya renloka aoba nung alizüng tasen ka tongtetba asütsü. Iba asayamung atema Bharat Benz-i teyari agütsütsü.

Mezüngbuba Dimapur Pickleball Open 2025 nung ajak senteper senpet sen 1,00,000 agütsütsü. Asayamung nung tebur tarep asaya, tarep temeyoktep asaya, tebur kija asaya aser tarep temeyoktep 50+ Open ta category balala

asayatsü.

Asayamung ya Nagaland Pickleball Association-i ayongzüker lir aser asayamung lapokba sentong nung Indian Pickleball Association (IPA) tir Suryaveer Singh Bhullar alakteta jaoker asütsü aser IPA CEO Aditya Khanna-ia shilem agütsü, koba ajanga state nung pickleball asayartem atema iba asayamung ya koda tongtibang

aji sayur.

Kasa mapang nung asayamung ayongba committee-i title sponsor Bharat Benz JK Trucking aser partner ajak dang parnoki teyari tulu agütsüba atema kanga pelaba lemsatepogo. Parnoki teyari agütsüba ya pickleball asaya terenlok aser lokti nung libaliro tajung benshitsü atema ajungmesotsü asoshi kanga tongtibang lir.

Dimapur Pickleball Open 2025 ya flagship annual asayamung ka kümdaktsütsü sentong lir. Iba ajanga pickleball asaya tali renloka odaktsütsü aser Nagaland ya iba asaya atema teyongtsü ka kümdaktsütsü.

BILEMDANGANG

"Nisung ajaki takok angutsü jangrar, saka takok angutsü asoshi renemtsü jangrar ishika dang."